



Broj: UP-I-KSI-09-5/23

Datum: 12.05.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba zakona od strane B. O. iz Brčkog, ██████████, član Upravnog odbora Fonda zdravstvenog osiguranja Brčko distrikta Bosne i Hercegovine, kao nosioca javne funkcije, na 55. sjednici održanoj dana 12.05.2023. godine, donijela je sljedeće

RJEŠENJE

- I. **UTVRĐUJE SE** da je B. O. iz Brčkog, ██████████, član Upravnog odbora Fonda zdravstvenog osiguranja Brčko distrikta Bosne i Hercegovine, nosilac javne funkcije, postupio protivno članu 19. stav (1) i (2), te članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da u Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, nije prijavio nepokretnu imovinu člana porodičnog domaćinstva, oca nosioca javne funkcije, podnesenom dana 21.01.2022. godine Komisiji za odlučivanje o sukobu interesa.
- II. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, B. O. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Образложење

Komisija za odlučivanje o sukobu interesa je po službenoj dužnosti Zaključkom broj: UP-I-KSI-09-5/23 od 24.01.2023. godine, pokrenula postupak protiv B. O., član Upravnog odbora Fonda zdravstvenog osiguranja Brčko distrikta Bosne i Hercegovine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 21.01.2022. godine od strane nosioca javne funkcije Komisiji i podataka prikupljenih od nadležnih organa i institucija o nepokretnoj imovini člana porodičnog domaćinstva, jer nosilac javne funkcije nije prijavio odnosno unio u Izvještaj o imovinskom stanju nepokretnu imovinu člana porodičnog domaćinstva, oca nosioca javne funkcije tačnije nekretninu označenu kao parcela broj: 1493/2 „OKUĆNICA“ nekategorisani put, u ukupnoj površini od 178 m², upisana u Z.K. ulošku broj 475 k.o. Brezik, suvlasništvo R. O., sa dijelom od 1/2, član zajedničkog domaćinstva, otac nosioca javne

funkcije, te nekretnina označena kao parcela broj: 1494/6 „UTRINA“ nekategorisani put, u površini od 336 m², upisana u Z.K. ulošku broj 466 k.o. Brezik, suvlasništvo R. O., sa dijelom od 1/4, član zajedničkog domaćinstva, oca nosioca javne funkcije, čime je postupio protivno članu 19. stav (1) i (2), te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema Zaključka o pokretanju postupka, broj: UP-I-KSI-09-5/23 od 24.01.2023. godine, zaprimljen 31.01.2023. godine, B. O., član Upravnog odbora Fonda zdravstvenog osiguranja Brčko distrikta Bosne i Hercegovine, kao nosilac javne funkcije je dana 01.02.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da je napravio propust, da pored placa i kuće u kojima živi na adresi [REDACTED], nije naveo zemljište koje je u vlasništvu njegovog oca R. O.. Dalje navodi, da na navedenoj adresi, na placu površine oko 550 m², postoje dva zasebna stambena objekta u istom dvorištu, sa istim ulazom i sve je u vlasništvu njegovog oca i majke. Da u jednom objektu živi on sa porodicom, a otac i majka žive u drugom objektu. Te, popunjavajući Izvještaj, naveo je sve koji žive na pomenutoj adresi, smatrajući da ako živi u istom dvorištu sa roditeljima, u njihovoj kući, da žive u zajedničkom domaćinstvu. Dok u stvarnosti žive u dva odvojena objekta, te roditelji imaju svoje prihode i rashode, a on i njegova porodica svoje. Naposljetku je kazao, da nije postojala namjera da se podaci sakriju od Komisije za odlučivanje o sukobu interesa kao i da se ista dovede u zabludu u pogledu tačnosti i potpunosti podataka, odnosno da je prilikom popunjavanja Izvještaja došlo do nenamjernog propusta.

Uvidom u dopis Osnovnog suda Brčko distrikta Bosne i Hercegovine Registar zemljišta broj: 096-0-RZ-22-003221 od 29.09.2022. godine, zk. uložak broj 475 i 466, k.o. Brezik i zk. uložak broj 479 i 2165 k.o. Brčko 2, utvrđeno je da je R. O. upisan u vlasnički list, kao suvlasnik predmetne nekretnine.

B. O. je Odlukom broj: [REDACTED] godine imenovan za člana Upravnog odbora Fonda zdravstvenog osiguranja Brčko distrikta Bosne i Hercegovine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 22. Poslovnika o radu Komisije za odlučivanje o sukobu interesa propisano je da je stranka u postupku u smislu ovog poslovnika nosilac javne funkcije.

Uvidom u Izvod iz matične knjige rođenih broj: 12.-000002-3383/2022 od 29.06.2022. godine, utvrđeno je da je R. O., otac B. O.. U Izvještaju o imovinskom stanju-Aneks II, B. O. je u rubriku „Podaci o roditeljima“ upisao R. O., te je zbog svega navedenog obaveza nosioca javne funkcije unijeti podatke o imovini svog roditelja u Izvještaj o imovinskom stanju.

Član 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u BiH i inostranstvu.

Primjenom navedenih zakonskih odredaba na utvrđeno činjenično stanje, ocjenjeno je da u konkretnom slučaju postoji povreda Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da B. O. nije u Izvještaju o imovinskom stanju podnesenom dana 25.01.2022. godine Komisiji za odlučivanje o sukobu interesa unio podatak o nepokretnoj imovini oca, odnosno člana porodičnog domaćinstva čime je postupio protivno članu 19. stav (1) i (2), te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, a pri tome vodeći računa o težini i posljedicama povrede Zakona, te činjenici da je B. O., nosilac javne funkcije bio u nedoumici oko definicije člana porodičnog domaćinstva, te se prema njegovom postupanju i odgovornosti, ličnosti nosioca javne funkcije, odnosu imenovanog prema kršenju odredaba Zakona kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici radi o očito lakšem obliku kršenja odredaba Zakona, koje nisu nanijele štetu integritetu javne funkcije koju B. O. obavlja, Komisija je stava da izrečena opomena kako je to navedeno u stavu (2) izreke rješenja u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. [REDACTED]
2. Internet stranici Komisije,
3. Evidenciji i
4. Arhivi.